

**UKA 2017/107: Uunga siunnersuut: Kalaallit Nunaata nunap immikkoortuinut kommu-
neqarfinnullu aggorneqarnera pillugu Inatsisartut inatsisaat nr. xx, xx. xxx 2017-
imeersoq**

pillugu

Inatsisinut Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Debora Kleist, Inuit Ataqtigiit, Siulittaasuugallartoq

Inatsisartunut ilaasortaq Laura Táunâjik, Siumut

Inatsisartunut ilaasortaq Iddimangiiu Bianco, Inuit Ataqtigiit

Inatsisartunut ilaasortaq Henrik Fleischer, Partii Naleraq, ataatsimiititaliami sinniisoq

Inatsisartunut ilaasortaq Ineqi Kielsen, Siumut, ataatsimiititaliami sinniisoq

1. Siunnersuut tunuliaqutaalu

Qaasuitsup Kommunia 2018-imi januaarip aallaqqaataanniit ima avinneqassaaq Kommune Qeqertalik (Kujalleq) aamma Avannaata Kommunia (Avannarleq).

Tamatuma kingorna Kommune Qeqertalik tassaalissaaq qanga kommuniusimasut Aasiaat, Qasigianniguit, Qeqertarsuaq kiisalu Kangaatsiaq, Avannaatalu Kommunia tassaalissalluni qanga kommuniusimasut Ilulissat, Uummannaq, Upernavik kiisalu Qaanaaq.

Aggorniliineq kommunini suliaasaqarfiit aqqissuuteqqinneqarnerata allanngortinneqarneranik Inatsisartut inatsisaata, Inatsisartut 2016-imi ukiakkut ataatsimiinneranni akuersissutigineqartup malittuanik pivoq.

Kommunit killeqarfii nutaat inatsisissatut siunnersuutikkut aalajangersarneqarput.

Aallaavittut kommunitoqqat 2009 sioqqullugu aggorneqarnerat naapertorlugu aggornilersuisoqarnissaa siunnersuutigineqartoq Inatsisinut Ataatsimiititaliap paasivaa.

2. Inatsisinut Ataatsimiititaliap inassuteqaataa

Kommunit akornanni killeqarfissatut siunnersuutigineqartut pillugit tusarniaanermut peqataasut uparuaatissaqarsimanngitsut, siullermeerinninnermilu siunnersuut tapersorsorluarneqartoq Inatsisinut Ataatsimiititaliap paasivaa.

Siunnersuutip ataatsimiititaliaq allanik oqaaseqaateqarnissaanut tunngavissinngimmagu ataatsimiititaliap isumaqatigiittup siunnersuutip akuersissutigineqarnissaa inassutigaa.

Inatsisinut Ataatsimiititaliap taamatut oqaaseqaateqarluni siunnersuut aappassaaniigassanngortippaa.

Debora Kleist
Siulittaasuugallartoq
Inuit Ataqatigiit

Iddimangiiu Bianco
Inuit Ataqatigiit

Laura Táunâjik
Siumut

Ineqi Kielsen
Siumut

Henrik Fleischer
Partii Naleraq